

## **Neujahrsapéro Schloss Laupen, 6. Januar 2013**

Liebi Froue u Manne, sehr geehrti Frou Regierigsrätin, sehr geehrte Herr Oberamtmäa, liebi Gescht vo nach und färn. Im Name vor liwohnergmeind Loupe u vor Stiftig Schloss Loupe darf ig öich alli hie obe uf em Schloss zu däm zwöite Nöijahrsapéro begrüesse. Zum erschte Mau isch es aber so, dass itz die näii Stiftig, sozsäge als Bsitzere vo däm Schloss, iiglade het - die Stiftig, wo das Schloss sit churzer Zyt und in eigeter Regie verwaltet.

Es isch bsungers schön, dass mer hüt o höche Bsuech dörfe empfah, hie, im stille Weschte. I ha mir natürlech guet überleit, was me da churz u prägnant chönnti säge, we men e Huuffe Lüt amen e söttige Aalass darf begrüesse. U de ersch no am Aafang vom ne näie Jahr. Em Aafang vor e näie Gschicht uf üsem Schloss. Em Aafang vom ne wichtige u vielleicht o chli wägwisende Jahr für Bärn West.

I wott ja nume churz rede. Drum hie mini paar Gedanke, bevor ig de dr Frou Egger darf ds Wort übergäh: Für Loupe stöh i däm u i de nöchschte paar Jahr ganz wichtige Entscheidige u Projekt bevor: Mir wei üsi Verkehrsproblem löse - Stichwort Ortsdurchfahrt -, mir sötte o unbedingt dr Hochwasserschutz ar Sense verbessere, d Brügg saniere - gmeinsam mit em Kanton; dr öffentlech Verchehr überchunnt es näis Gsicht - mir dänke a d'Bahnhofverlegig, wo mer mit SBB, BLS und o mit em Kanton zäme wette voratribe; es näis lichoufsäntrum u viel zuesätzleche Wohnruum wird ds Läbe i üsem Stedtli markant verändere - gmeinsam mit de Inveschtore und em Coop sueche mer da - nid nume uf em Polyareal - nach de beschte Lösige; mit de Burgergemeind Loupe und em plante Wärmeverbund wei mer o nid nume d Heizproblem im Schuelhus löse; u schliesslech isch ds Schloss Loupe vor e Stiftig übernoh worde, wo näis Läbe i die alte Muure bringt - zäme mit em Kanton, mit grosszügige Gemeinde us em Kanton Bärn u us em Kanton Friburg, mit de Burger, mit Inschtituti-one u vilne Einzelpersone.

Das si nume es paar wenigi Stichwort gsi. Aber alli hei oppis gemeinsam, und es git es völlig simpels Rezäpt: Es geit nume, we mer zäme schaffe, we mer gemeinsami Ziel wei erreiche, über Partei-, Kantons- u Gemeindsgränze ewäg. Allei söttegi Sache z'bewege? Unmöglich! Drum - das isch scho fasch mini Überleitig: Liebi Frou Egger, mir danken ech scho itz, dass o dir mit üs im näie Jahr zäme schaffet u mithälfet, dass Loupe nid nume 1339 wichtig gsi isch für Bärn. Mir fröien üs, dass dihr hüt zuen is sit cho, mir fröien üs uf öii Wort. Uf en es guets 2013! Em Schloss, em Kanton, dr Gemein, öich allne. I ha fertig!

René Spicher